



REPUBLIKA E SHQIPËRISË
UNIVERSITETI I MJEKËSISË, TIRANË
REKTORI

Nr. 601 prot.

Tiranë, më 07.03.2025

UDHËZIM
Nr. 1, datë 07.03.2025

PËR
“PROCEDURAT E APLIKIMIT DHE PRANIMIT NË PROGRAMET E CIKLIT TË TRETË
TË STUDIMEVE “DOKTORATË” NË NJËSITË KRYESORE TË UNIVERSITETIT TË
MJEKËSISË, TIRANË PËR VITIN AKADEMIK 2024-2025”

Mbështetur në ligjin nr. 80/2015 “Për arsimin e lartë dhe kërkimin shkencor në institucionet e arsimit të lartë në Republikën e Shqipërisë” nenet 77, 78 dhe 79; Vendimin e KM nr. 112, datë 23.02.2018 “Për përcaktimin e kriterëve për fitimin e gradës shkencore “Doktor” dhe të standardeve shtetërore për fitimin e titujve akademikë “Profesor i Asociuar” dhe “Profesor”, i ndryshuar, Kreu I; Statutin e UMT-së, nenet 5, 88 dhe 89; Rregulloren e Universitetit të Mjekësisë, Tiranë, neni 70; Rregulloren “Për organizimin e programeve të studimit të doktoratave” e ndryshuar; Udhëzimin e MAS nr. 52, datë 3.12.2015 “Për përcaktimin e niveleve të gjuhëve të huaja dhe të testeve ndërkombëtare, për pranimit në programet e studimit të ciklit të dytë dhe të tretë, në institucionet e arsimit të lartë” i ndryshuar; Vendimin e Senatit Akademik të UMT-së nr. 83, datë 24.05.2024 “Për miratimin e kuotave të pranimit për programet e ciklit të tretë të studimeve “Doktoratë” për vitin akademik 2024-2025, në Universitetin e Mjekësisë, Tiranë” si dhe shkresën e MAS me nr. 8057/1 prot., datë 22.01.2025, “Mbi listën e udhëheqësve në programet e studimit të ciklit të tretë në doktoratë, për vitin akademik 2024-2025”,

UDHËZOJ:

I. Kërkesat themelore për regjistrimin e kandidatëve

1. Për t’u regjistruar në një program studimit të ciklit të tretë të doktoratës, aplikanti duhet të përmbushë këto kriterë të përgjithshme:
 - a) Të ketë përfunduar studimet e larta në fushën e kërkuar dhe të zotërojë një diplomë të nivelit të dytë, një diplomë të integruar të nivelit të dytë ose një diplomë të barasvlershme sipas sistemit të vjetër, të fituar jashtë vendit dhe të njohur nga organet kompetente;
 - b) Të zotërojë me dëshmi një prej 5 gjuhëve të huaja të BE-së të paktën në nivelin B2 (Anglisht, Gjermanisht, Spanjisht, Italisht, Frëngjisht), në përputhje me Udhëzimin përkatës të Ministrisë përgjegjëse për arsimin;
 - c) Të ketë notë mesatare të ponderuar të ciklit të dytë mbi 8 (tetë). Për aplikantët që kanë diplomë të barasvlershme sipas sistemit të vjetër, bëhet përlllogaritja e mesatares së ponderuar nga

komisioni përkatës në njësinë kryesore brenda 3 (tre) ditëve pune nga përfundimi i afatit të aplikimit.

- d) Të paraqesë projekt individual kërkimor-shkencor në përputhje me fushat kërkimore të përcaktuara nga njësia bazë;
 - e) Të dëshmojë nëpërmjet projekt idesë/planit individual kërkimor, njohuri dhe aftësi për:
 - Të menduarin krijues;
 - Sensin kritik të zhvillimit të fushës së kërkimit;
 - Lidhjet midis fushave të kërkimit;
 - Zgjidhjen e problemeve që dalin gjatë punës kërkimore;
 - Kompetencë në menaxhimin e kompleksitetit e kërkimit dhe ideve të reja.
 - f) Të ketë dy rekomandime për këtë aplikim, me vlerësime pozitive nga persona, që kanë titullin akademik “Profesor i Asociuar” ose “Profesor”, të cilët njohin aftësitë akademike dhe profesionale të kandidatit;
 - g) Të mos jenë marrë masa disiplinore ndaj tij apo të mos jenë gjetur shkelje të rregullave të etikës së kërkimit shkencor, të të drejtave që burojnë nga pronësia intelektuale apo shkelje të rregullave kundër plagjiaturës, si edhe shkelje të kodit deontologjik profesional;
 - h) Të vetëdeklarojë se, është në gjendje të zbatojë standardet shkencore dhe etike;
 - i) Të mos jetë duke ndjekur një program tjetër studimi.
2. Njësitë bazë mund të propozojnë edhe kritere preferenciale të tilla si:
- a) Preferohet të punojë në fushën përkatëse. Prioritet kanë personeli akademik me kohë të plotë në njësitë bazë të UMT-së;
 - b) Preferohet të ketë përfunduar specializim afatgjatë në fushën përkatëse;
 - c) Preferohet të ketë eksperiencë në mësimdhënie në fushën përkatëse;
 - d) Preferohet të ketë marrë pjesë në aktivitete shkencore si dhe të ketë botime në fushën përkatëse.
3. Në vlerësimin e kandidatëve, merren në konsideratë kriteret e miratuara, sipas raporteve në vijim:
- | | |
|---|---------|
| a) Nota mesatare e ponderuar e studimeve të ciklit të dytë | 20 pikë |
| b) Projekt propozimi për kërkimin shkencor | 30 pikë |
| c) Eksperienca në mësimdhënie | 10 pikë |
| d) Veprimtaria botuese, pjesëmarrja në projekte kërkimore | 10 pikë |
| e) Eksperienca profesionale | 10 pikë |
| f) Kualifikime shkencore/profesionale (specializim, master ekzekutiv, trajnim mbi 6 muaj pa ndërprerje) | 10 pikë |
| g) Kritere të tjera preferenciale të vendosura nga njësia bazë/njësitë bazë | 10 pikë |

II. Dokumentacioni që duhet të dorëzojnë kandidatët aplikantë për t’u pranuar në programet e studimit të ciklit të tretë “Doktoratë” në UMT

Kërkesa e aplikantit, drejtuar njësisë bazë përgjegjëse për programin e studimit të doktoratës, në të cilën theksohet propozimi për temën, është dokumenti fillestar i aplikimit i cili përmban bashkëngjitur edhe dokumentet e mëposhtme:

1. *Curriculum Vitae* personale dhe bibliografi të punimeve shkencore, të cilat duhet të jenë të dokumentuara, nëse aplikanti ka të tilla;

2. kopje të noterizuar të diplomave të kërkuara sipas pikës I/1/a, shoqëruar me listën e notave apo suplementin e diplomës. Diploma e huaj shoqërohet me vërtetimin e njohjes nga Ministria përgjegjëse për arsimin;
3. kopje të noterizuar të diplomave apo certifikatave të kualifikimeve të ciklit të tretë apo të një diplome ose certifikate të barasvlershme me to, shoqëruar me listën e notave apo suplementin e diplomës, nëse kandidati zotëron një të tillë;
4. fotokopje e kartës së identitetit/pasaportës;
5. 2 (dy) fotografi;
6. 2 (dy) rekomandime nga personel me titull akademik në fushën e shëndetit lidhur me këtë aplikim, të lëshuar brenda 3 muajve të fundit;
7. një deklaratë që pranon të shlyejë të gjitha detyrimet financiare lidhur me koston e këtyre studimeve, në rastet e vetëfinancimit, (Deklarata nr. 1);
8. dëshmi të gjuhës/gjuhëve të huaja të paktën në nivelin B2 (Anglisht, Gjermanisht, Spanjisht, Italisht, Frëngjisht);
9. vërtetim nga qendra e punës, nëse është i punësuar, që dëshmon se aplikanti është personel akademik ose personel i përfshirë në kërkim shkencor;
10. deklaratë e një prej udhëheqësve shkencorë të miratuar në programin përkatës të studimit se, projekti i kërkimit shkencor të propozuar nga kandidati është i përshtatshëm për aplikimin për studime të doktoratës në këtë program. Një udhëheqës shkencor mund të lëshojë më shumë se një deklaratë udhëheqjeje;
11. vendimi i njësisë bazë për fushat e kërkimit shkencor të njësisë, sipas publikimit në faqen zyrtare të njësisë kryesore;
12. vendimi i njësisë bazë për dokumentacionin e kërkuar për aplikim, sipas publikimit në faqen zyrtare të njësisë kryesore;
13. propozimi i kërkimit shkencor, ku të evidentohen objektivat e kërkimit shkencor, metodologjia që do të ndiqet, nevoja për studim të thelluar në fushën e propozuar dhe risitë, që pritet të sjellë punimi, platforma/plani i punës kërkimore-shkencore i ndarë në vite, si dhe mundësia që studimi të mbulohet nga grante kërkimore-shkencore, hartuar dhe nënshkruar nga kandidati;
14. vetëdeklarim i aplikantit se nuk ka patur në të kaluarën shkelje të rregullave të etikës së kërkimit shkencor, të të drejtave që burojnë nga pronësia intelektuale apo shkelje të rregullave kundër plagjiaturës, si dhe që do të zbatojë standardet shkencore dhe etike, (Deklarata nr. 2).
15. vetëdeklarim i aplikantit se, nuk është duke ndjekur një program tjetër studimi, (Deklarata nr. 3).
16. mandat pagesa për tarifën e aplikimit sipas Vendimit përkatës të Bordit të Administrimit të UMT-së.

Dokumentacioni duhet të dorëzohet i inventarizuar në dy kopje, një prej të cilave shoqëron dosjen dhe kopja tjetër i jepet kandidatit.

III. Procedura e shpalljes, aplikimit dhe pranimit në programet e ciklit të tretë të studimeve të doktoratës

1. Njësitë kryesore të Universitetit të Mjekësisë, Tiranë organizojnë procesin e aplikimit, pranimit dhe regjistrimit në programet e studimeve të ciklit të tretë të doktoratës.

2. Njësitë bazë përcjellin në Dekanat kriteret preferenciale të vlerësimit të kandidatëve, sipas përcaktimeve në pikat I/2 dhe I/3, të këtij Udhëzimi, jo më vonë se 3 (tre) ditë pune përpara hapjes së aplikimeve në këto programe.
3. Njësitë kryesore, bëjnë publikimin e kriterëve, procedurave dhe afateve për konkursin e pranimit në programet e studimit të doktoratës, në faqet zyrtare të internetit të çdo njësie kryesore dhe të UMT-së, të paktën 1 (një) muaj përpara përfundimit të afatit për depozitimin e kërkesave.
4. Njoftimi publik në faqen zyrtare të çdo njësie kryesore dhe të UMT-së, duhet të përmbajë listën e programeve të studimit të doktoratës sipas fakulteteve përkatëse; numrin e kuotave sipas fushave dhe nënfushave (*sipas Vendimit të Senatit Akademik të UMT nr. 83, datë 24.05.2024*); fushat e kërkimit, listën e udhëheqësve shkencorë, kriteret e përgjithshme dhe ato preferenciale; dokumentacionin që kandidati duhet të dorëzojë; afatin dhe mënyrën e dorëzimit të dokumentacionit, si dhe procedurat e vlerësimit të kandidatëve. Njoftimi publik duhet të jetë i shprehur qartë, të mos lërë vend për keqkuptime dhe/ose interpretime në asnjë prej elementëve të tij.
5. Kandidatët të cilët aplikojnë në një program studimi të ciklit të tretë “Doktoratë” në UMT, dorëzojnë aplikimet e tyre në zyrën e protokoll arkivës të njësisë kryesore përkatëse, sipas përcaktimeve në njoftimin publik, fizikisht ose nëpërmjet shërbimit postar. Në rastin e aplikimit përmes shërbimit postar, data në vulën e shërbimit postar do të shërbejë për të përcaktuar respektimin e afateve të aplikimit. Dokumentacioni duhet të jetë i inventarizuar sipas numrit të dokumenteve dhe faqet përkatëse.
6. Përpara datës së mbylljes së aplikimeve, Dekanati publikon afatet e shqyrtimit të dosjeve në faqen zyrtare të njësisë kryesore.
7. Jo më vonë se 1 (një) javë pas përfundimit të datës së aplikimeve, njësia kryesore bën publike listën e aplikantëve (*të anonimizuar me ID përkatëse*) dhe i përcjell njësisë bazë përkatëse dosjet e aplikimeve të kandidatëve për programet e doktoratës.
8. Komisionet *ad hoc* të vlerësimit ngrihen jo më vonë se 1 (një) javë para datës së përfundimit të aplikimeve dhe përbëhen nga të gjithë anëtarët e njësisë bazë, që mbajnë titullin akademik “Profesor” ose “Profesor i Asociuar” dhe drejtohen nga përgjegjësi i njësisë bazë. Në rastet e programeve me nënfusha specifike, dekanati mund të ngrejë komisione *ad hoc* sipas nënfushave, përbërja e të cilëve është nga jo më pak se 3 (tre) anëtarë. Përbërja e komisioneve i njoftohet Rektoratit jo më vonë se 3 (tre) ditë pune nga ngritja e tyre. Në rastet kur njësitë bazë bashkëpunojnë për organizimin e programit të studimeve të ciklit të tretë të doktoratës, komisioni *ad hoc* mund të ngrihet në nivel njësie kryesore dhe udhëhiqet nga përgjegjësi i programit.
9. Përparësi në përzgjedhjen e kandidatëve, në programin e studimit të ciklit të tretë “Doktoratë” në UMT, ka personeli akademik me kohë të plotë në UMT; personeli akademik me kohë të pjesshme në UMT; kandidatët e tjerë të punësuar si personel akademik në institucionet e tjera publike dhe jopublike të arsimit të lartë, apo personel kërkimor në një institucion të kërkimit bazë ose të zbatuar, pranë institucioneve të arsimit të lartë të llojit “universitet” ose “akademi” në RSH.
10. Brenda 5 (pesë) ditëve pune Komisioni *ad hoc*, verifikon përmbushjen e kriterëve themelore, bën përzgjedhjen dhe renditjen e kandidatëve, sipas fushave/nënfushave të programeve të studimit të doktoratës, mbështetur në propozimin e aplikantit dhe në dokumentacionin në dosjen

përkatëse, referuar një liste të qartë dhe transparente mbi pikëzimin e kritereve specifike të aplikantëve.

11. Lista e kandidatëve (*e anonimizuar me ID përkatëse*), të përzgjedhur e të listuar në rend zbritës nga Komisioni ad hoc miratohet në mbledhjen e njësisë bazë dhe përcillet për publikim paraprak tek drejtuesi i njësisë kryesore. Lista i përcillet Rektoratit për njoftim.
12. Aplikantët kanë të drejtën e ankimit, brenda 3 (tre) ditëve pune nga shpallja e listës paraprake të kandidatëve. Ankimi bëhet pranë zyrës së protokollit të njësisë kryesore dhe i përcillet menjëherë komisionit ad hoc përkatës. Komisionet ad hoc brenda 2 (dy) ditëve pune shqyrtojnë ankimet dhe marrin vendim mbi shqyrtimin e ankimit. Vendimi i përcillet menjëherë dekanit, i cili vendos në dispozicion të ankuesit një kopje të tij.
13. Pas përfundimit të procesit të ankimimit, Komisioni *ad hoc* vendos përfundimisht udhëheqësit shkencorë sipas renditjes së kandidatëve dhe propozimeve të kërkimit shkencor. Nëse e vlerëson, në këtë mbledhje Komisioni mund të ftojë edhe kandidatët fitues të programit.
14. Lista e kandidatëve fitues, e udhëheqësve shkencorë përkatës dhe projekteve kërkimore fituese përcillet tek drejtuesi i njësisë kryesore, shoqëruar me një relacion shpjegues për punën e kryer, sipas çdo fushe/nënfushe.
15. Drejtuesi i njësisë kryesore shqyrton dokumentacionin dhe procedurat e kryera dhe pas miratimit e përcjell praktikën e plotë në Rektoratin e UMT-së. Pas miratimit nga Rektori i UMT-së, lista e kandidatëve fitues, e udhëheqësve shkencorë përkatës dhe projekteve kërkimore fituese përcillet për publikim tek drejtuesi i njësisë kryesore.
16. Drejtuesi i njësisë kryesore brenda 3 (tre) ditëve pune publikon listën e kandidatëve fitues (*e anonimizuar me ID përkatëse*).
17. Rektorati i UMT-së gëzon të drejtën e monitorimit të procesit të aplikimit dhe shpalljes së fituesve në këto programe studimi.
18. Brenda 7 (shtatë) ditëve kalendarike nga publikimi i listës përfundimtare kryhet regjistrimi i kandidatëve fitues pranë sekretarisë përkatëse, si dhe bëhet nënshkrimi i kontratës midis kandidatit fitues dhe përgjegjësit të programeve të studimit të doktoratës në nivel njësie kryesore, bashkëlidhur këtij Udhëzimi.
19. Brenda 30 (tridhjetë) ditëve kalendarike nga regjistrimi i kandidatëve fitues, UMT-ja përcjell në QSHA listën e doktorantëve të regjistruar, në formë shkresore dhe elektronike, me qëllim pajisjen me numër matrikullimi, në zbatim të udhëzimit përkatës të ministrisë përgjegjëse për arsimin.
20. Në varësi të projektit kërkimor, kandidatët fitues të programit duhet të kërkojnë miratim nga Këshillit i Etikës të UMT-së për projektin e tyre kërkimor.

IV. Dispozita të fundit

1. Njësitë kryesore të UMT-së të shpallin hapjen e procesit të aplikimeve për programin e studimeve të ciklit të tretë të doktoratës në datën 20 mars 2025.
2. Për të gjitha çështjet të cilat nuk trajtohen në këtë Udhëzim, do të zbatohen përcaktimet ligjore të Rregullores “*Për organizimin e programeve të studimit të doktoratave*”, e ndryshuar.

3. Ngarkohen për zbatimin e këtij Udhëzimi, njësitë kryesore të Universitetit të Mjekësisë, Tiranë, si dhe Drejtoria e Kërkimit, Promovimit Akademik dhe Komunikimit dhe Drejtoria e Administrimit Akademik dhe Kurrikulës në Rektoratin e UMT-së.
4. Ky Udhëzim hyn në fuqi menjëherë.

REKTORI
PROF. DR. XHELADIN DRAÇINI



Deklaratë nr. 1

Data __. __. 2025

DEKLARATË

Unë i/e nënshkruari/a _____, aplikant/e në programin e studimit të doktoratës në fushën/nënfushën _____, të Fakultetit _____, të UMT-së, deklaroj nën përgjegjësinë time personale se, shprehem dakord të paguaj detyrimet financiare në programin e studimeve të doktoratës, në përputhje me legjislacionin në fuqi për këtë program studimi.

Kjo deklaratë nënshkruhet me vullnet të plotë e të lirë.

DEKLARUES/E

(emër atësi mbiemër)

Deklaratë nr. 2

Data __. __. 2025

DEKLARATË

Unë i nënshkruari _____, me nr personal identifikimi (ID) _____, deklaroj nën përgjegjësinë time personale se, nuk kam kryer shkelje të rregullave të etikës së kërkimit shkencor, të të drejtave që burojnë nga pronësia intelektuale apo shkelje të rregullave kundër plagjiaturës.

Gjithashtu, deklaroj se, do të zbatoj standardet shkencore dhe etike gjatë kërkimit shkencor në programin e studimit të doktoratës.

Kjo deklaratë nënshkruhet me vullnet të plotë e të lirë.

DEKLARUES

(emër atësi mbiemër)

Deklaratë nr. 3

Data __. __. 2025

DEKLARATË

Unë i nënshkruari _____, me nr. personal identifikimi (ID) _____, deklaroj nën përgjegjësinë time personale se, nuk jam duke ndjekur ndonjë program tjetër studimi.

Kjo deklaratë nënshkruhet me vullnet të plotë e të lirë.

DEKLARUES

(emër atësi mbiemër)